

11/06/2005

Mahathir-Nilai

PERTINGKAT NILAI MULIA ATASI PENGARUH NEGATIF

KUALA LUMPUR, 11 Jun (Bernama) -- Tun Dr Mahathir Mohamad berkata hari ini antara punca utama semakin berleluasanya pengaruh negatif di kalangan masyarakat negara ini ialah nilai-nilai mulia yang semakin terhakis.

Oleh itu kata bekas Perdana Menteri, semua pihak khususnya ibu bapa dan guru mesti memainkan peranan masing-masing dengan lebih berkesan dalam menerapkan nilai-nilai baik di kalangan anak-anak sebagai benteng mencegah penularan gejala tidak sihat.

"Yang menentukan baik atau buruknya sesuatu masyarakat adalah nilai yang diamalkan oleh masyarakat itu. Jika kita pupuk nilai-nilai mulia saya percaya tidak akan berlaku gejala negatif.

"Apa yang berlaku sekarang ialah pengaruh buruk dari televisyen, dari internet misalnya semakin kuat berbanding nilai mulia. Itu yang menyebabkan berlakunya jenayah rogol, bunuh dan sebagainya," katanya pada Wacana Pendidikan Bersama Tun Dr Mahathir, anjuran Yayasan Pahang di sini.

Beliau berkata demikian semasa sesi soal jawab pada majlis yang dihadiri kira-kira 2,000 anak Pahang terdiri daripada pelajar institusi pendidikan tinggi dari seluruh negara.

Dr Mahathir juga menegaskan bahawa undang-undang semata-mata tidak akan mampu membendung gejala negatif kerana lumrahnya manusia yang melanggar undang-undang beranggapan mereka boleh mengelakkan dari ditangkap pihak berkuasa.

"Cuba tanya diri kita mengapa kita tidak menagih dadah? Adakah kerana ada undang-undang atau nilai-nilai yang ditanam pada diri kita yang mengatakan dadah itu tidak baik," katanya.

Terdahulu semasa berucap Dr Mahathir mengingatkan golongan muda di negara ini agar tidak melupakan sejarah, sebaliknya menjadikan ia sebagai panduan untuk masa depan.

"Bila dikatakan ingat (sejarah) di sini, bukan ingat tarikh bila sesuatu peristiwa berlaku tetapi kita kena belajar sejarah agar kita tahu kesilapan yang telah kita lakukan dulu supaya kita boleh elak daripada mengulangnya," katanya.

Beliau berkata sejarah juga menunjukkan walau semaju mana sesebuah tamadun itu, kegagalan belajar daripada sejarah - sejarah negara sendiri mahupun negara lain - boleh meruntuhkan ketamadunan yang telah dicapai.

Oleh itu katanya, generasi muda tidak harus leka dengan kesenangan yang telah dicapai oleh negara ini sekarang, sebaliknya sentiasa meningkatkan keupayaan diri sebagai persediaan menghadapi sebarang kesukaran yang mungkin akan dihadapi.

-- BERNAMA

NM AKT RS